

天
台
山
全
志

天台山全志卷之六

楚郢張聯元覺菴輯

寺

善興寺 在華頂舊名華頂圓覺道場晉天福元年僧德韶建僧智顥嘗宴坐於此上有降魔塔伏虎壇鬼疊石又有太白書堂甘泉先生居舊傳又有葛元泰固王羲之墨池宋治平三年改今額明洪武四年燬於火僧宗濟重興隆慶中又燬復新之

崇善寺 在赤城山下晉太元元年建先是興寧中僧曇猷依巖造寺號中巖後以多赤蟻徙平地宋大中

祥符元年改崇善政和八年改玉京觀未幾仍舊放生池在焉

國清寺 在天台縣北十里在華頂南五十里舊名天

台隋開皇十八年建先是智顥脩禪於此後煬帝敕

楊州衆僧參立寺名弟子智璪啓昔陳世有定光禪

師亦曾見夢於先師曰寺若成國卽清當呼爲國清

寺

一云智顥於陳大建七年秋九月入天台未議卜居常宿石橋見三人臯幘絳衣有一老僧引而進

曰禪師若欲造寺山下有寺基用以仰給因問曰當於何時能辦此寺老僧曰今非其時寺若成國卽清

大業元年賜此額李邕爲記所爲應運題寺是也唐

會昌中廢大中五年重建散騎常侍柳公權書大中

國清之寺六字宋景德二年改景德國清寺前後珍
賜甚夥合三朝御書數百卷有御書閣後燬於寇獨
頸所題蓮經與西域貝多葉經一卷及隋旃檀佛像
佛牙僅存建炎二年重新之上方有兜率臺左右有
五峰及拾得巖雙澗合流浮圖插漢及振錫迴瀾二
橋後巖有瀑布大爲奇勝九域志以齊州靈巖潤州
棲霞荊州玉泉併國清爲四絕有香積廚謌羅大神
像寺前有新羅園唐新羅僧悟空所基又有清音亭
雨花亭殿後有雷音堂振奎閣閣後無畏室室後更
好亭竝有雲頂菴古竺院棲雲樓諸勝前有解脫門

卷之二
門外有止觀亭隋時所建元至正間築萬工池明洪武甲子大風雨殿宇盡爲摧毀隆慶間重建又燬萬曆間又重建壬寅賜御經一藏建藏經閣舊有謝伋撰重建國清寺碑銘今亡寺內又有三賢堂祀豐干寒山拾得又有錫杖泉爲普明遺蹟

高明寺 在天台縣東北二十里按舊經本名高明唐天祐七年建今攷所藏錢氏遺墨乃清泰三年號智者幽溪道場今殿前有經幢刻云天福二年捨入幽溪禪院可驗也宋大中祥符元年改淨名不知何時復今額古老相傳謂先此惟喬木參天薜蘿翳坎壈

麐是居樵牧罕至智顥時居佛隴講淨名經忽經爲風飄翩翩不下乃杖錫披荆尋經所詣行五里許風息而經憩此顥覲斯靈異復愛茲山峰巒秀發清溪鑒心乃卽其地以營淨居智顥十二刹此其一也其後或寺稱淨名堂名翻經者以此明嘉靖間寺隨田廢萬曆間傳燈重建內有圓通洞看雲石

真覺寺 在天台縣北二十三里隋開皇十七年建僧智顥葬焉龕前置雙石塔號定慧真身塔院宋祥符元年改真覺寺後廢隆慶間重興今又傾圮

大慈寺 在天台縣北二十九里舊名脩禪或名禪林

陳大建七年爲僧智顥建蓋顥思脩初地寶定光授
記銀地之所直寺門巽隅號佛隴顥第二宴坐處隋
煬國清乃更寺爲道場唐會昌中廢咸通八年重建
宋大中祥符元年改今額其堂曰淨名堂以顥嘗講
是經故名又有智者泉漱玉亭又有普賢閣陳宣帝
爲智顥建又有顥所供普賢及手書陀羅尼經隋時
所賜寶冠又有銅鈴杵又有虞世南所書華嚴經紹
興中爲秦檜取去明洪武十七年殿宇爲風雨所壞
僧德興重建舊有宋龍圖閣直學士葉清臣撰佛隴
記今亡

太平寺 在天台縣東北二十五里白雲峰側峨眉峰下梁乾化元年建智顥第六道場前對香爐峰又有宴坐石鼓石牀看經臺皆智顥經行處舊有雷峰堂併白雲堂

普慶寺 在天台縣東北三十里舊名保興福慶院晉天福四年建宋治平三年改今額卽顥歎讀書堂故址

九明寺 在天台縣東北三十里漢乾化二年建僧智顥宴坐九折道場宋治平三年改仁壽院今復爲九明寺

清心寺 在螺溪舊號螺溪院有山名招隱下有石泓
如金昔智顥曾放螺於溪中故名今有螺如巨蠣或
出沒焉宋治平三年改今額

東廣福寺 在清心寺東舊名靈水菴宋寶元二年建
治平三年改壽聖紹興三十一年改東廣福院明初
廢後復興

慧明寺 在東蒼山之麓舊有智顥手書陀羅尼經四
卷前三卷久亡宋僧元通倣智顥書補完之又別書
一卷以備亡失原存於大慈後存於慧明嘉靖間爲
譁守取去今所存者是元通補完之筆又有石晉天

福年間鑄

資福寺 在天台縣東四十五里舊名清化赤烏二年建宋治平三年改興化隆興初參政賀允中乞爲香燈院改今額明初廢後重建

大智寺 在縣東五十里宋開寶七年建太平興國初號大明治平三年改今額

崇法寺 在天台縣東五十里五代僧願齊建吳越王賜師號崇法寺因名焉

東安隱寺 在天台縣東六十里舊名隱臯漢乾佑三年建宋治平三年改今額

寶華寺 在天台縣東六十里舊名太平唐乾符二年建宋治平三年改今額

廣潤寺 在寧海縣南五十里王愛山東三十里晉興寧中曇猷建初名普濟宋祥符間賜今額

丹丘寺 在寧海縣南九十里相傳葛洪煉丹之地劉宋元嘉二年以梅長者所居菴而建因其誦經感丹鳳賜名丹丘靈鳳山宋開寶中改爲院大中祥符中賜額

崇福寺 在梁王山谷呼梁王寺舊名資福唐武德中建宋大中祥符中改今額元祐四年僧懷智造藏殿

羅適有記前有古松盤偃詰曲若蛇龍然相傳數百年
蘊蓋數畝又有主簿洪皓祠

永樂寺 在王愛山上梁天鑒中建羅適有記

以上四寺屬寧海由朱嶧至桐巖嶺足分路入天台

其路稍平夷十五里 一由叉路梁王寺西 入天台山嶺俱峻

天封寺 在天台縣北五十里陳大建七年智顥建初

顥入山見一老父告云師卜菴遇盤石可止其後果
如所告遂結廬焉因自號靈墟蓋第五思脩地其注
涅槃經處號智者嶺中有卓錫泉北望一峰摩雲卽
華頂也隋開皇五年賜號靈墟道場漢乾佑中改智

者院宋大中祥符元年改壽昌寺治平三年改今額
舊有瑞雲閣

大同寺 在天封寺北四十里舊在舉西名菩提大同
周顯德五年建後徙今地宋治平三年改大明院今
復爲大同寺

澄深寺 在大同寺北四十里舊號澄明宋治平三年
改今額

慈聖寺 在華頂峰北二十里舊名蹟聖宋治平三年
改今額 以上三寺俱在華頂之北

白巖寺 在天台縣西北三十里僧普耀初憩此地有

神江白郎告曰此吾居也以師德業尊廣願推此室
相奉遂呼白巖隋大業中建唐貞觀十年賜號白巖
寺會昌中廢咸通二年重建宋大中祥符六年改妙
智寺今復爲白巖寺舊有列秀亭及王羲之墨池
普光寺 在天台縣西北三十里僧德韶第十三道場
舊名大覺普光塔院宋祥符元年改慧覺後復爲普
光

慈雲寺 在天台縣西北三十五里舊名安國雲居院
晉天福元年建僧德韶第二道場大中祥符元年改
今額隆興初併入護國明初寺廢萬曆間重興寺內

有雙松亭

長壽寺 在天台縣西北四十五里唐清泰元年建宋祥符元年改普光院永樂初廢復興

護國寺 在天台縣西北三十里舊名般若周顯德四年建僧德韶第九道場宋大中祥符元年改今額後錢太師忱乞爲香燈院加廣恩護國寺舊有宋中書平章錢惟演撰護國寺碑銘今亡

接待寺 在關嶺南去護國寺二十五里北去天姥寺二十里

上方廣寺 下方廣寺 舊有石橋寺傳係五百應真

之境又有方廣寺隱其中宋建中靖國元年建後燬於火紹熙四年復新之中有應真閣妙音響空曠風佇真許來先照諸亭多廢今曇花亭在石橋之側上方廣寺在石橋上流其下方廣寺在石梁之下可以仰望飛瀑又古傳有五百應真居方廣寺感應略記云永嘉全億長史畫半千羅漢形像每一迎請必於石橋宿夜焚香具鑼鉉幢蓋引導入於殿香風送幢幢之勢前靡而入入門卽止其方廣寺梵唄方作先有金色鳥飛翔後林樹石畔吳越國王錢氏頻年施供養造五百銅羅漢或云安壽昌寺晉曇猷曾於此結草爲

卷 宋仁宗供施石橋五百應真敕朕荷祖宗之休
不承洪業未嘗不虛懷逸士側席幽人雅聞天台之
石橋近接四明之雪竇智覺之遺風具在應真之靈
蹟儼存慨想名山載形夢寐今遣內使張履信齋沉
香山子一座龍茶二百觔銀五百兩御衣一襲表朕
崇重之意景佑四年景定中賈似道命僧妙弘建曇華亭
旣成供五百聖僧茶茶甌中現一異花中有大士應
供四字僧佛樹重新應真記云天台山者乃震旦之
奇境五百應真駐錫之地晉時曇獻親入聖
寺五代錢王數感祐祥非妄誕也正德丁丑同明輝
抵石梁遍覽勝境見應真之像天匠工巧奇妙絕倫
經歷年久顏色脫落因重新之

萬年報恩寺 在石梁西十五里唐太和七年僧普岸
建初晉興寧僧曇猷憩此四顧八峰回抱雙澗合流
以爲真福田也遂經始焉會昌中廢太中六年號鎮
國平田梁龍德中改福田宋雍熙二年改壽昌寺敕
造羅漢像五百十六身奉安壽昌建中靖國初火崇
寧三年重建號天寧萬年紹興九年改報恩廣孝爲
光孝後復爲萬年先是宋太平天禧中累賜朱衣寶
蓋及御袍曳屨諸珍玩甚衆淳熙間建山門兩廡開
大池香積有金極深廣世傳閻提首那尊者所鑄東
南有羅漢嶺又寺內有親到堂以宋仁宗賜衣時有

如朕親到之語故云萬曆中亦賜藏經又有覽衆亭妙蓮閣 國朝順治初燬於寇僧無礙重興

闡法寺 在天台縣南五里晉黎護將軍劉元捨宅建名建平寺初在縣南後有鴿子和尚徙今地號鴿子道場寺側有靈龜峰又有綴石坡陀迤邐草木蒙茂左右溪流縈帶居民皆植桃花春時望如綺錯宋祥符元年改今額洪武初廢後又重建

大覺寺 在天台縣東南一十五里宋乾德三年建初號華嚴道場治平三年改今額弘治中燬隨又重建禪林寺 在天台縣西南一十五里舊號龍山集雲院

僧智顥建唐天寶六年改龍山爲始豐宋乾德二年
號龍山崇修院大中祥符元年改今額

興教寺 在天台縣東南三十里以衆峰回抱名回巒
菴後更爲院宋祥符元年改今額明洪武初廢成化
中復興

天宮寺 在天台縣西三十里舊名旃檀瑞像院吳越
時僧德韶建號第十一道場宋祥符元年改今額明
初廢後重興

水陸寺 在天台縣西三十里宋太平興國四年建熙
寧三年改壽聖紹興間改西廣福今復爲水陸寺

無相寺 舊在瑞龍巖北名無相院一名戲龍院唐咸
通二年建因僧師簡以杖叩臥龍起雨故名遠近勝
槩凡十瀑布潭石門徑鹹水澗瑞龍天柱香爐紫凝
應澤五峰寶陀羅漢二巖宋祥符元年改今額治平
中徙於縣南三十五里

翠屏寺 在天台縣西南三十五里唐乾符二年建因
山如屏峙名翠屏菴宋治平三年改淨安院今爲翠
屏寺

文殊寺 在天台縣西四十里晉天福二年建宋治平
三年改禪智明初廢後復興

開巖寺 在天台縣西南四十里梁普通三年建初有異僧攀開此巖六瑞纘紛如雪賜額天花尊者開巖院唐會昌中罷周顯德間長臂尊者全泰重建改泗洲禪院宋改鎮國院洪武中廢後重興仍曰開巖

永福寺 在天台縣西四十里唐咸通四年建舊名靈瑞宋大中祥符元年改今額

寧國寺 在天台縣西四十五里梁普通三年僧智達斬荆結廬每誦經則羣鶴翔空紫雲覆頂故山名紫凝後建寺名棲禪唐會昌中廢大中五年重建宋祥符元年改今額天聖四年僧居昱新之號法華明初

廢後重新

寶興寺 在天台縣西南五十里舊名寶壽漢乾佑三年建宋治平三年改今額

廣嚴寺 在天台縣西五十里舊名長隴唐光啓三年建凡三徙至今地初名廣嚴宋治平三年改今額寺有貧婆鐘又有懷榮羅漢真身在焉

明巖寺 在廣嚴寺西二十五里舊名雲光院號暗巖周顯德四年吳越昭儀孫氏建卽僧全宰棲禪處更名明巖介居巖谷間道狹不容軌入門兩石夾峙號石門前對幽石橫敞飛閣巖竇嵌空堂宇半居巖下

大槩如寒石山宋開寶七年陞爲寺祥符元年改大
梵寺有十景雲棲洞攝石八寸巖初來菴瀑布水索
幽石重巖洞門響巖舊傳寒山拾得隱身之地今巖
中有人馬跡髡髮俗稱閻丘太守影云

寒巖寺 在寒石山梁開平元年建寒山子棲遁處周
顯德中改聖壽昭儀孫氏重新之由明巖北五里而
上四山聳秀水流亂山鏗鏘如珮環院宇周阿竝置
巖下窗扉軒戶開闔於煙雲紫翠中宋大中祥符三年
改福善院今爲寒巖寺

淨慧寺 在天台縣西八十里舊名寶慈唐乾化元年

建爲天台十大刹之一舊傳葛元嘗植蘆數本故今
寺前有蘆峰

普門寺 在天台縣西南七十里漢乾佑三年建宋祥
符元年改福應僧德韶第六道場今復爲普門

天姥寺 在新昌天姥山周廣順元年僧德韶建初名
天姥院宋至道元年改廣福院洪武十五年改禪寺
舊有接台館

真覺寺 在沃洲山宋治平間名真覺院洪武十五年
改禪寺

菴

金地菴 在金地嶺晉開運三年建梁大同初僧定光
卓菴居之巽峰有枯石數片屹然林莽間謂之招手
石

宿佛菴 在四顧坪正德間僧佛樹結茅於此

碧雲菴 在聖蹟石傍土名仙人鞋僧如宗泐
聖蹟菴 菴鄰碧雲僧如應重興

石橋菴 在石梁之左曇猷厥初脩道遺址宋令丁大
榮易置爲龍君祠久廢嘉靖間復建爲菴靜夜聞方
廣鐘鼓之聲

圓通靜居 在石橋菴左聞石梁瀑聲

真福菴 在石橋菴後凡禮石梁者於此更衣
萬松菴 去石橋西五六里土名道人坑昔爲有道者
所居故名嘉靖間僧明賢重新之

寂光菴 去石橋五里許土名遙尖萬曆間建

脩隱菴 去石橋五里僧如珂建其嶺曰松雲傳燈有
聯曰林間野客松爲侶石上枯藤雲作衣

岫雲菴 在新昌桃源洞撥雲峰下卽劉阮採藥處

清虛菴 在桃源觀西宋乾道間晦菴先生遊水簾還

訪梁平叔曾宿於菴

阮澗菴 在劉門山

太平菴 在會墅

廢寺

飛霞寺 在赤城山腹梁岳陽王建其後僧定光居之
梁亡寺廢

白馬寺 在天台縣西十里陳時建唐會昌間廢
瀑布寺 在桐柏嶺西瀑布之側宋元嘉二年僧法順
建

佛窟寺 在三井西峰遺則卓菴居之唐會昌中廢後
爲昭慶院元復爲佛窟寺

普慈院 舊在蓮花峰頂名大慈院開寶七年建治平

三年改額

清涼寺 在東坑嶺頭隋開皇二年建

寶相寺 舊名寶國華嚴院吳越錢王時僧德韶建宋

大中祥符元年改額

證教寺 舊名無量壽塔院宋建隆元年建僧德韶第

十道場

景福院 周顯德七年建俗呼茶院僧德韶施茗處宋

開寶三年賜號崇福大中祥符元年改額

秀巖寺 舊名西雲晉天福八年建僧德韶第三道場

宋祥符元年改額

西定慧院 漢乾佑元年建僧德韶第四道場宋祥符元年改額

淨名院 在天台縣北五十里舊名通圓定慧周顯德

四年建僧德韶第一道場宋大中祥符元年改額

寶相寺 在天台縣西南七十里舊名彌陀塔院僧德

韶第七道場周顯德中建宋大中祥符元年賜額

隱岳寺 在鳳凰山之西梁大同元年西域梵僧建隋

大業元年廢唐貞觀元年重建

傳教寺 在天台縣東北一十里宋乾德元年建五代

時僧義寂於此演天台教故名係顧承徽舍宅所建

寶雲曾居之大中祥符元年改東定慧院因普賢院亦號定慧呼爲西定慧

赤巖寺 在天台縣南一十里舊名寶壽觀音院周廣順初建宋治平三年改明聖院後爲赤巖寺

驚峰寺 在天台縣西五十里舊名蛤嶺菴唐大中三年僧懷玉建宋咸平三年改額

慧明院 在華頂峰上舊名慧日俗又呼東峰梁乾化元年建宋治平三年改額

金繩院 在天台縣西五十里卽棲禪支院宋慶曆中賜額

西安隱寺

舊名臻福宋建隆三年建大中祥符元年

改額前有雙溪五峰頗爲幽勝

西竺院

在大慈寺西北舊名國泰唐太中十年建僧

智顥著止觀之地前有溪流亦號幽溪道場宋太中

祥符元年賜額

金文藏院

萬年支院漢乾佑三年建宋咸平十一年賜

額太宗嘗賜大藏經五千二百卷護飾甚偉建中靖

國初燬

斷橋道場

在斷橋宋開寶元年建

永寧院

在縣東北十五里舊名普宇周顯德四年吳

越王建宋治平三年改額

天台山全志卷之七

楚郢張聯元覺菴輯

釋

晉

曇猷 一名法猷燉煌人苦行習禪初止剡之石城山
興寧中至天台赤城舊傳赤城有五百大神居之言
輒降禍猷坐禪石室有猛虎巨蛇競出猷不動一日
有神詣猷願他徙而去天台懸崖峻峙古老相傳上
有精舍得道者居之雖有石橋跨澗而橫石斷人且
莓苔青滑自古已來無得至者猷行至石橋聞空中

聲曰君今未得度却後十年自當來也武帝太元八年入寂

道猷 馮姓山陰人卽帛道猷少以篇牘著名居天姥山

竺潛 字法深居天姥山晉哀帝兩遣使招之至建業隨還山支遁求買沃洲小嶺潛曰未聞巢許買山而隱人稱爲深公

支遁 字道林河內人王羲之守會稽遁與孫綽共往因論莊子逍遙游遁作數千言才藻新奇王披襟畱連延住靈嘉寺隨入天姥沃洲性好養鶴有放鶴峰

人稱爲支公

晏蘭 青州人支姓蔬食樂禪日誦經三十萬言晉太元中遊剡後憩始豐赤城晉元熙中卒於山

懷玉 丹丘人誦淨土諸經精苦至四十年一日見西

方聖衆有擎銀臺而至師曰如我本望必得金臺言

發而臺隱三七日後向人復來曰法師已得上品生忽異光照室越三日書偈御金臺而去台州段刺史

有詩贊曰我師一念登初地佛國笙歌兩度來惟有

門前古槐樹枝低祇爲掛金臺

按郡志唐刺史無段姓

齊

普耀 卽普遼初憩天台有巖如室有神汪白郎告曰此吾居也以師德業尊廣願推此室相奉遂呼爲白巖後卽其旁建寺因名之

事見白郎巖記

從一 未詳何許人居始豐瀑布山學兼內外典不服五穀唯餌棗栗年垂百歲與隱士褚伯玉爲林下之交每論道輒畱連信宿終於山中

慧明 姓康康居人祖世避地於東吳明出家止章安東寺建元中與沙門共登赤城山石室見曇猷尸骸不朽禪室荒蕪乃開剪更立堂室造臥佛併曇猷像更名臥佛巖竟陵文宣王遣使召至京師隨辭還山

梁

定光 青州人姓許字靜照大同初隱佛隴居山三十
載人罕知者智顥未至前二年預告山民曰大善知
識當來相就宜種荳造醬編蒲爲席更起屋待之陳
大建十三年坐滅凡三瘞體骨湧出後置殿乃已舊
傳錫杖尚畱在昌安卽會稽隆安院也

天花尊者 普通間來遊天台縣西南有巖高廣挺峙
師以神力擘開感天雨六花人稱師爲天花尊者今
開巖寺是其遺蹟又慧實慧達俱梁時人慧實姓許
氏潁川人梁末至天台禪定絕跡人世五十年脇不

帖席慧達姓王氏襄陽人居天台瀑布寺二人皆有道高僧

陳

智顥 字德安姓陳氏穎川人年十五作沙門夢見極高山頂有僧招手曰汝當居此汝當終此初住瓦官寺陳大建七年入天台度石梁見佛隴南峰左右映帶其夕宿定光禪師草菴定光謂曰還憶夢中招手事乎此峰金地我已居之北峰銀地汝當居之卽今脩禪道場是也陳後主顧問羣臣曰釋門誰爲名勝徐陵對曰瓦官禪師德邁風霜禪鑑淵海今高步天

台法雲東靄陳主凡三遣使皆自手書敕詔陳亡後
隋煬帝爲晉王時信奉之居台山二十二年定道場
十二所國清其一也後示滅其徒輿葬佛隴嘗著止
觀十卷緇流宗爲天台教宋天聖中詔求其書賜名
天台總錄其徒如灌頂普明智歸智璪皆有名宣帝
割始豐縣調敕智顥禪師佛法雄傑時匠所宗訓兼
道俗國之望也宜割始豐縣調以充衆費蠲兩戶民
用供薪水主者施行大建九年二月又隋文帝敕
敬問光宅寺智顥禪師朕於佛教敬信精重往者周
武之時毀壞佛法發心立願必須護持及受命於天

仍卽興復仰憑神力法輪重轉十方衆生俱獲利益
比以有陳虐殘暴東南百姓勞役不勝其苦故命
將出師爲民除害吳越之地今得廓清道俗乂安深
稱朕意朕尊崇正法救濟蒼生欲令福田永存津梁
無極師旣已離世網脩己化人必希獎進僧伍固守
禁戒使見者欽服聞卽生喜方副大道之心是爲出
家之業若身從道服心染俗塵非直舍生之類無所
歸依抑恐妙法之門更來謗讟宜相勸勵以固朕心
春日漸暄道體如宜也

隋

灌頂

姓吳氏章安人字法雲陳至德初謁智顥於脩

禪寺所說法悉能領解禎明元年隨智者止金陵光

宅隋開皇間至江陵玉泉後還山造國清寺今爲天

台第二祖著涅槃元義二卷疏二十卷時隋末寇盜

羣起師自序云推度聖文凡歷五載何年不見兵火

何歲不見干戈菜食水齋冰牀雪被其勞苦有若此

者晚年於會稽稱心精舍說法唐貞觀六年終於國

清寺先是貞觀元年同學智晞絕而復甦曰吾生兜

率見先師智者寶座有一座尚空彼天人曰却後六

年灌頂來昇此座計歲不謬

智越 南陽人郭姓受業於智顥誦法華至滿萬部所
住之處瓶水自滿居露山精舍

智璪 臨海人張氏初投安靜寺出家聞國清智顥名
卽往受業見鬼不懼食毒不傷大業後前後八入參
覲每加異禮唐貞觀間入滅

智晞 頴川人陳氏受智顥禪訣研心不倦居佛隴殿
堂展闢唯香爐臺未架時香爐多檉栢木晞欲伐用
衆疑神所據夜夢神送疏捨木遂遣伐之初智顥勸
沿江居民爲放生池未久復行漁捕晞與章安焚香
咒願有漁人見僧立篋意謂墮水者乘舟往救忽不

見居人覩驗遂停採一日羣獸衆鳥翔集東山銅鐘忽響震山谷師曰此召我也趺坐執如意說法良久寂然衆泣復啓目誠曰有生必滅寧足爲悲或問坐處曰據吾夢驗在兜率宮見吾先師侍左右者皆坐寶座惟一空座吾詢所以答云却後六年頂法師當昇此座說法卽趺坐而化

法彥 清河張氏陳大建七年侍智顥於天台授禪那之旨寂坐林間不居房舍常入定七日方起專脩禪法三十餘年常坐不臥

等觀 富陽孫氏居天台常誦法華入滅時沐浴更衣

面西趺坐稱三聖尊號及智者號各百餘聲復爲惠
法師說三觀法門且云此吾親承大師口說言畢而
終

普明 會稽朱姓陳大建十四年來天台居國清半巖
以取水爲難以杖叩其石曰此石出水不亦快乎泉
卽湧出日給千衆今錫杖泉是也

唐

智威 蔣姓縉雲人家世業儒年十八爲本郡堂長郡
學之職父母令歸納婦路逢梵僧謂曰少年何意欲
違昔重誓耶蓋前身爲徐陵聽智者講經親立此願

願童真出家卽往國清投灌頂爲師傳天台教爲天台第六祖後住錫軒轅煉丹山

湛然姓戚氏世居晉陵之荆溪開元間從學左溪左溪沒湛然謂門弟子曰道之難行也我知之矣古之至人靜以觀其復動以應其物二俱不住乃蹈大方今之人或蕩於空或膠於有自病病他適用不振將欲取正舍余誰歸乃祖述所傳著爲記文凡數十萬言曰金鉗曰義例天寶大曆間三詔辭疾不起晚歸台嶺主台教今赤城釋籤巖是也

行滿萬州南浦人遊天台聽荆溪說止觀頓悟妙旨

因棲止華頂峰下智者院充茶頭所居檻外大松上有寄生小樹遇師出必媯媯伍俯時謂此樹爲茶頭作禮四十年未嘗便溺或謂大士現身受食而實不食故致此也嘗注涅槃疏

明淨 高密人南遊東越天台諸山衣服籃縷日至村中乞食齋還中路值羣虎張口閉目若有饑相淨以匙持飯內其口中餘者對面噉盡嘗值亢旱苗稼並枯淫祀之流妄祈邀請終不能致淨曰可罷諸邪禱吾獨能降遂齋靜室七日雲布雨施高下滂沛

豐干 不知何許人居天台國清寺或云邑人豐尚書

之子形貌寢惡被髮布裘或時唱歌人問之第云隨我騎虎遊松門與寒山拾得相親三人每邂逅則長吟大笑人莫測也貞觀中太守閻丘蔭遇豐干於京邸問天台有何聖賢答云國清寺有寒山拾得狀貌風狂歌笑不常見之不識識之不得取相蓋文殊普賢後身也閻丘至寺二人力據火談笑閻丘遽前揖之二人云豐干饒舌遂馳走而去

寒山子 不言氏族以在寒石山中居止得名容貌枯悴布襦零落以樺皮爲冠曳大木屐時來國清寺就捨得取衆僧殘食菜滓食之或廊下徐行或時叫噪

望空謾罵寺僧以杖逼逐翻身撫掌大笑而去雖出言如狂而有意趣嘗得詩輒題石間好事者隨錄之得一百餘首名寒山詩多述山林幽隱之興或譏諷時態警勵風俗徐靈府序而傳之終寒石山中

拾得 不知名氏因豐干在山中經行至赤城道側聞兒啼聲遂尋見一子可數歲因名拾得在國清內滌器每日齋畢澄濾食滓以筒盛之寒山來卽負之去有偈曰無嗔卽是戒心淨卽出家我性與爾合一切法無差僧道翹慕寒山詩以拾得偈附焉

鴻山 初作沙彌自福唐至國清求戒寒山拾得掃松

迎迓臨行寒山送之云千山萬水遇潭卽止後於洪
州泐潭山得道

一行 襄姓鉅鹿人早歲聰敏讀書不再師事普寂因
窮大衍曆求訪師資至國清聞僧於院中布算其聲
轂轂旣而謂其徒曰今日當有弟子求吾算法已合
到門豈無人導達耶卽除一算曰门前水西流弟子
當至一行承言而入稽首請法盡受其術邢和璞嘗
謂尹愔曰一行其聖人乎漢之洛下閻造大初曆云
後八百歲當差一日則有聖人定之今年期畢矣而
一行造大衍曆正其差謬則洛下閻之言信矣元宗

嘗問國祚幾何有畱難否一行曰鑾輿有萬里之行
社稷終吉帝驚問不答退以小金盒進之曰至萬里
卽開及祿山亂駕幸成都至萬里橋忽悟開盒視之
蓋當歸少許未幾果歸昭宗初封吉王唐至昭宗而
滅故識終吉寂滅時春秋四十五帝哭之甚哀親製
碑書出庫錢建塔

光緒 不知何許人得法上堂曰但以衆生日用而不
知譬如三千大千世界日月星辰江河淮濟一切含
靈從一毛孔入一毛孔毛孔不小世界不大其中衆
生不覺不知若要易會上座日用亦復不知時有僧

問日裏僧駄像夜裏像駄僧未審此意何如師曰關
黎豈不是從茶堂裏來

智覺 餘杭王氏子韶國師深器之謂曰汝與元帥有
緣他日大興佛事忠懿王請開山靈隱後入天台山
靈默 姓宣氏毘陵人初住白沙道場十二載又住東
道場一夜震雷暴雨懸崖大樹倒欹菴側樹枝交絡
茅苦畧無少損元和初久旱沿澗見有青蛇夭矯瞪
目如視默咄之曰百姓枯渴苗死汝胡不施雨救民
耶至夜果大雨

道蓬 不知何許人唐大曆中依荆溪於佛龐洞悟幽

元無所疑滯荆溪曰吾子其能嗣興吾道矣貞元二十一年日本國僧最澄來聽講法旣泛舸東還指一山爲天台創一刹遙尊邃爲始祖日本傳教實起於此

遺則 京兆人長孫氏南遊天台隱於瀑布之西嶺元和中慕道者日至有弟子百數遂築室廬漸成法席佛窟之稱自師始也居四十年而終塔全身於本山唐韓又有碑銘存國清寺

普岸 姓蔡氏漢東人得法於百丈懷海禪師大和中謂衆曰吾山水之遊未厭諸人勿相畱滯天台赤城

道猷曾止華頂石梁智者降魔將遊之也自襄陽來
從沃州天姥入天台之西門得平川谷中結茅居之
未幾見虓虎乳子瞪目而視岸以杖按其頭曰貧道
聞此山是神仙窟宅羅漢隱居今欲寄此安禪勿相
驚撓經宿虎領子而去遂搆成院號平田今萬年寺
也

道育 新羅國人唐景福間來遊天台住錫平田寺恒
持一鉢受食訖常坐脇不著席日中灑掃殿廊得
殘羹雖色惡氣變收貯於器齋時自食與僧供浴洽
煎茶遇薪木中蠹蟲乃置之遠地護生偏切所服大

布衲甚重每夏初至秋末夜則裸露胸背任蚊蚋蟻
噏四十餘載未嘗少異凡對晤賓客止云伊伊二字
不通華語然其會認人意且無差脫白髮龐眉身出
紺赤色舍利有如珠顆至晉天福三年終於僧堂年
八十餘寺僧昇上山後焚之灰中得舍利不可勝數
五代

聖者頭陀 初憩國清寺一日詣雷馬山伐木建殿神
通致兩木皆蔽流而下雷馬潭有頭陀菴

德韶 處州龍泉人陳氏子字惠丹年十五梵僧勉令
出家遍參諸方清泰二年入天台山覩智者大師遺

蹤有若舊居時謂智顥後身後於通元峰卓菴有偈
曰通元峰頂不是人間心外無法滿目青山開寶四
年華頂峰摧聲震一山師曰吾非久矣明年六月大
星殞於峰頂林木變白師乃示滅於蓮華峰世稱詔
國師

師簡 初憩天台戲龍院時大旱有龍臥巖窟簡以杖
扣之隨卽滂沱簡善書求者多以齋酒易之德韶常
語人曰此簡羅漢也後示寂於錢塘其徒迎其骨建
塔於無相院

道榮 淳化中居長隴院卽今廣嚴寺習禪定靈異頗

多人以羅漢目之旣入滅人有見千壽昌五百應真
位者今肉身尚存凡有所請多響應宋元符間縣令
太史章以久旱他求無驗迎至縣雨卽充洽尋送還
寺作長歌以頌其德碑刻尚在寺中

惟靖 吳門人也年十三入寧國寺於天台受具嘗侵
晨赴禪林寺晨粥虎隨到寺門踞地候靖出復隨巨
跡極多靖恐人知以鋤滅虎跡

智勤 德韶法嗣居紫凝山普門寺

淨光 名義寂字常照永嘉胡氏子幼白二親出家誦
法華期月而徹造天台學止觀於竦法師吳越忠懿

王覽永嘉集以止觀教語問韶國師韶曰此是敎義
可問天台寂師王卽召師以問前義師曰唐末喪亂
敎籍散毀諸文多在海外於是王遣十使往日本國
求取敎典旣回王爲建寺螺溪扁曰定慧賜號淨光
法師

長臂道者 名全泰西土僧也其臂甚長因以爲名重
建開巖寺

寶雲 名義通字惟遠高麗國人族姓尹氏梵相異常
項有肉髻眉毫宛轉伸長五六寸晉天福時遊中國
至天台訪韶國師忽有契悟及聞一心三觀之旨乃

歎曰圓頓之學畢茲轍矣遂畱受業久之東歸假道
四明郡守太師錢惟治固畱之師曰緣旣汝合辭不
我卻因止行漕使顧承徽舍宅爲傳教院太平興國
六年賜額爲寶雲升堂受業者惟法智慈雲爲上常
呼人爲鄉人問其故曰吾以淨土爲故鄉諸人皆當
往生皆吾鄉之人也

宋

善戒 卽戒闍黎臨海三江婁氏子生而能言一日謂
母曰可備齋七位父母怪之爲營齋俟之日脯果有
僧七人撫掌至家曰聞君有奇子特來相賀設齋罷

母抱兒出見兒撫掌而笑僧遂謝去戒謂父母曰
人皆佛菩薩示現爾五歲自稱六和大師十五出家
至杭見天醫波利多問曰子何來曰從緣來曰是何
姓曰是佛姓波利多異之爲雜髮其神變事跡具見
闍黎示現錄將滅之日於台州兜率寺擊鼓集衆爲
說觀音圓通法門現諸神變還昇法座於左手現日
右手現月放百寶光明次於口中現蓮花十三朵花
放寶光十二色戒曰大衆老僧世緣已畢與汝作別
言訖合掌而逝性火自焚舍利無數太守趙邦彥聞
於朝謚曰廣慧慈濟寧化仁德大師

法智 名知禮字約言四明金氏太平興國四年從寶雲學教觀首座謂之曰法界次第汝當奉持師曰何謂法界座曰大總持法門圓融無礙者是也師曰既圓融無礙何有次第座無對淳化間因學徒繁集徙居保恩院道法大熾爲學徒淵藪日本嘗遣徒持三十問詢求法要師答之咸臻其妙天台之教莫盛此時真宗知名遣使至其居命脩懺法厚有賜予翰林學士楊億駙馬都尉李遵易白丞相寇準奏賜紫服及法智大師號天聖六年結跏趺坐而逝經月發龕顏膚如生

慈雲 名遵式字知白寧海葉氏入國清普賢像前誓傳天台之道雍熙元年道中夢老僧謂曰吾文殊和上也及見寶雲正所夢僧卽北面受業寶雲滅後乃反天台善屬詩江州太守許端夫序其詩曰慈雲之詩文貫於道言切於理酷似彭澤

處咸 臨海人王姓字應之初住赤城崇善寺縣令李庭芝夢神人曰天台五祖臺下有龍頭九九和尚宜就見之至邑諮詢莫知其說閩士陳白曰天台五祖居赤城今咸師住山生於丙辰九月九日其龍頭九九之謂乎庭芝卽往謁見談道有契會以寺宇隘陋

庭芝捐金卜遷東南地開基之日獲銅磬於土中後

請主白蓮奏賜法真之號居山五十年元祐間正月

法鼓擊之不鳴者七日告衆曰吾將行矣趺坐而化

按李庭芝係天台令元豐三年任郡志載庭芝守台至郡諮詢誤今改正

居昱

錢塘人郭姓七歲曾扣疑于林逋兜角誦法華

經七日而周夏竦表爲沙彌天聖四年卒後二年啓

棺貌如生昱善爲詩有松聲和雨聽山色帶雲看之

句

元照

錢塘人唐姓字湛和號安忍子深明教律四方

宗之少遊天台度石橋合掌誦經想方廣而度者三

復達宴坐峰誦經失足幾墮如人扶之而免與蒋之
奇楊傑諸人爲方外交劉燾作行業記

全宰 姓沈氏錢塘人初投徑山及脩禪觀入天台山
闡巖以永其志巖與寒山子所隱對峙皆魑魅木怪
所叢萃宰居二十餘年惡鳥革音山精讓窟其出入
經行有鬼物執役或掃其路或侍其旁或代汲泉或
供採菓時人見宰未嘗言後爲徑山禪侶迎歸
自詢 號國一道者雍熙初敕爲建寺後振火自焚舌
根不壞詔改寺爲壽昌今萬年是也

處謙 永嘉人潘姓字終倩住白蓮院爲王安石所知

州早請禱雨於潭謙語龍曰昔智者誨汝旱則施雨
今忘之耶言訖雨大注

元

先覩 號無見葉姓仙居人住華頂峰四十年操行卓
絕作偈趺坐示滅焚化舍利積成五采白乳如注宋
濂撰塔銘

雲噩 號夢堂住國清寺能詩文亦宋濂銘其塔

明

宋泐 字季潭臨海人周姓遍遊名刹曾主武林中天
竺明洪武時詔居天界能詩有看巖下眠雲詩云非

煙非霧曉濛濛萬象都歸一氣中深似海時初歇雨
白于綿處不隨風得閒漸有還鄉意偃臥寧無澤物
功亭際老僧來倚檻只疑下界頓成空後終於石佛
寺

宗濟 字北源姓李氏臨海人歸華頂二十七年足不
越閩重建殿屋後歸深雲菴

裘和尚 天台人初住國清寺後又遊外二十年而歸
華頂寺僧請師預道場師曰明午有火殃到寺日必
有火我不預也明午有一婦人從轎馬婢僕投寺中
施齋至晚寺中人問曰火殃何在師曰施粥婦人非

火殃耶忽火從中起一寺爲墟健跳楊千戶妻施師
履師亟穿走泥濘中楊妻心悔師知之遂還其履視
之如未嘗著土者嘗攜一小孫出遊途遇虎馴伏於
側世傳伏虎禪師後身也其神幻事蹟甚多父老猶
能言之

傅燈 高明寺僧博通內典傳南教宗於八分書法尤
工所著有天台山方外志